

ISUMALIUTISSIISUT**Kultureqarnermut, Ilinniartitaanermut, Iisimatusarnermut, Ilageeqarnermullu
Ataatsimiititaliap**

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaattut siunnersuummut isumaliutissiissutaa

Aappassaanneerreqarneranut

Ataatsimiititaliaq suliaqarnermi ukuninnga peqataaffigineqarpoq:

Hans Aronsen, (IA), Siulittaasoq
Jørgen-Ole Nyboe Nielsen (D), Siulittaasup tullia
Harald Bianco, (IA)
Ruth Heilmann, (S)
Aleqa Hammond, (S)

Ulloq 3. Oktober UKA 2012-mi suliarineqarnerata kingorna immikkoortoq ataatsimiititaliamit eqqartorneqarpoq.

Siunnersuutip imarisai siunertaalu

Siunnersuut Naalakkersuisut Meeqqanut Inuusuttunullu Periusissiaannut tapertaliussatut suliarineqarpoq, taamatullu siunnersuut Naalakkersuisut suleqatigiinnissamik isumaqatigiissutaanni aamma Naalagaaffiit Peqatigiit meeqqat pillugit isumaqatigiissutaanni anguniagaasunut pingaarnernut attuumavoq. Tamatuma saniatigut siunnersuutip 2011-mi novemberimi kommunini Namminersorlutillu Oqartussani suliaqartut assigiinngitsut isumasioqatigiinnerminni oqariartuutaasa anguniarnissaat siunertaraa, tassani ilaatigut suliat assigiinngitsut akimorlugit suleqatigiinnik pilersitsisarnissap pingaarutaa oqallisigineqarpoq. Kiisalu siunnersuut suliarineqarpoq Naalakkersuisut Ilinniartitsinermut periusissiaat aallaavigalugu, tamannalu UPA 2012-mi saqqummiunneqarpoq.

Siunnersuutip siunertaraa meeqqanut suli atualinngitsunut suliniutit eqaannerusumik aaqqissuunnissaat, ilaatigut meeqqanut inuusuttunullu tunngasutigut qitiusumi ingerlataqartut suliniutinut aallartinneqartunut piginnittutut misigitinnissaasa pingaartuunera inissaqartillugu.

Tamatuma saniatigut siunnersuutip siunertaraa allannguissamik pisariaqartitat piviusunngortinnissaat, taakku pineqartoq pillugu Inatsisartut peqqussutaata maanna atuuttup atuutilereerneratigut paasineqarput.

Siunnersuutittaaq matumuuna pingaartillugu qulakkeerniarpa, soorlu Meeqqanut Inuusuttunullu Periusissiami allassimasoq, piaartumik suliniuteqarnissap meeqqanut immikkut pisariaqartitsisunut naleqqiullugu pingaaruteqaataata ersersinnissaa. Tamatumuuna qularnaarniarneqarpoq meeqqat innarluutillit, allatulluunniit immikkut pisariaqartitsisut pisinnaasaasa tamarmiusut naammaginatumillu ilinniagaqaqqinnissamut piareersaataasumik atuarnissamut naleqqiullugu meeqqanut allanut naleqqiullugit sapinggisamik annertunerpaamik periarfissinnissaat.

Siunnersuummi siunertarineqarpoq innarluuteqaleratarsinnaanermut sunniutigineqartussat piffissami siviluunniit sunniuteqartussaagaluit imaluunniit arlaatigut piginnaasanik annikillisitinerit sapinggisamik minnerpaaffissaaniitinniarlugit. Siunertarineqarpoq sapinggisamik piaartumik meeqqat immikkut pisariaqartitsisut suliffeqarfiit akimorlugit suleqatigiissitanit paasiniarneqartarnissaat. Inuttut atugarisat pillugit aammalu inuiaqatigiit aningaasaqarnerisigut piffissap ingerlanerani pissarsiaqaataasussatut una siunnersuut nalilerneqarpoq.

Taakkua saniatigut Inatsisartut peqqussutaata atuutilerneraniit ilisimalerneqarsimasut pillugit siunnersuutip nalimmassarneqarnissa pisariaqarpoq.

Siunnersuutip Inatsisartuni siullermeerlugu suliarineqarnera.

Inuit Ataqtigiit

Suliffeqarfiit akimorlugit meeqqanut suli atualersimanngitsunut perorsaanermi suliniuteqarnermi nukittorsaataasutut ineriartuutaasutullu Inuit Ataqtigiinnit siunnersuut una isigineqarpoq. Inuit Ataqtigiit isumaqarput, meeqquerivitsialammik eqqussinermi aamma inuiaqatigiit perorsaanermi tunngavigisatut kulturikkut pingaartitaat siuarsarneqassasut. Inuit Ataqtigiit isumaqarput, meeqquerivinni sulisut piginnaasanik annertusaalluni pikkorissartitsisarnermik suliassamik tigusinissamut piginnaanngorsarneqassasut.

Inuit Ataqtigiit Naalakkersuisut siunnersuutaannut isumaqataapput, tassa meeqqat atuarfimmi atuarnerminni misigisaqarnerlusinnaanerannut siusissukkut suliniuteqarnermi pinngitsoortinneqarsinnaammata.

Siumut

FN-ip meeqqat pilugit isumaqtigiissutaa tungavigalugu meeqqat inuusuttullu ikiorserneqartarnissaata qulakkeerneqarnissaa pillugu naalakkersuisut siunnersuuteqarnerannut Siumut tungaviatigut isumaqataavoq.

Kommunini sulisut ilinniarsimasut amigaatigineqarsinnaanerannik ajornartorsiutaasinnaasut aaqqiiffigineqarsinnaanerat ajornakusoorsinnaasoq Siumut isumaqarpoq. Naalakkersuisut nakkutilliilluni kommuninut tikeraartarnissamut aammalu inatsisartut inatsisaata atuutilernerani pikkorissarnerit suut pilersaarutigineqarnersut Siumumit Naalakkersuisunit akineqarnissaat ujartornrjarpoq.

Demokratit

Demokratit isumaqarput, inatsisissatut siunnersuut manna ilinniartitaanerup nukittosarneqarnissaanut alloriarneq pingaartuusoq aammalu ilinniarneq piginnaasanillu annertusaaneq inuuneq naallugu suliniutissaaneranut aqutissaalluartut.

Demokratit isumaqarput, inatsisissaq una aqutigalugu meeqqat ataasiakkaat qitiutinneqarnissaat pisariaqartitaallu paasilluarneqarnerulissasut, imatullu paasineqassalluni piffissaagallartillugu meeqqat ikiortariaqartut ullumikkorniit sukkanerujussuarmik ikiorserneqarsinnaalernerannik.

Atassut

Atassut isumaqarpoq illoqarfinni mikinerusuni, illoqarfinni avinngarusimasuni, nunaqarfinnilu siunnersut una malitseqartikkuminaassinnaasoq, paaqqinittarfinni amerlasuuni pissutsit ullutsinnut naleqqutinngimmata imaluunniit siunertarisanut naleqqunatik.

Atassut isumaqarpoq, pilersaarusiornermik suliaqarnermi kommunit suleqatigineqassasut, taakuummatami inatsisit malitinneqarnissaanut akisussaasut. Ilanngullugulu Atassut

isumaqarpoq kommuninik suleqateqarnermut ilanngunneqassasoq ulluunerani paaqqinnittarfinni sulisut ilinniarteqqinneqarnissaannut qulakkeerinnineq.

Kattusseqatigiit Partiiat

Kattusseqatigiit Partiiata tunngaviatigut siunnersuut isumaqatigaat kissaatigalugulu børnehaveklassit meeqqat aturfianut eqquteqqinneqarnissaat ataatsimiititaliamit eqqartorneqassasoq.

Tusarniaanermut akissutit

Piffissani marlunni siunnersuut suliamut attuumassuteqartunut tusarniutigineqarsimavoq, siullermik 26. Januarimiit 2. Martsimut aappassaannillu 5. Junimiit 10. Julimut 2012. Marlorigarlugu tusarniutigineqarneranut tunngavigineqarpoq, tusarniaanermi siullermi PIP teknikikkut kukkusoqarneratigut qarasaasiakkut tusarniaaneq pillugu nalunaarfigineqarsimanngimmat.

Tusarniaanermi ataasiarluni allannguinnissamut tunngavissiisimavoq. Tusarniaanermut akissut pineqartoq inatsisissatut siunnersuummut ilanngunneqarpoq.

Inatsisissatut siunnersuutip ataatsimiititaliamit suliarineqarnera

Siunnersuutip aningaasatigut kingunissai

Siunnersuummi aningaasatigut kingunissartinneqartunut ilaapput sakkussanik iniariartortitsineq misileraanerlu, ilanngunneqassallutik nutserneqarnerat amerlisarneqarnerallu 2013-mullu 1.000.000 kr. Atorneqarnissaat naatsorsuutigineqarluni. Taakkua saniatigut aningaasartuutissanut ilanngunneqassapput sakkussanik nalimmassaanerit naleqqussaanerillu kiisalu paaqqinnittarfinni sulisut pikkorissartinneqarneri, 2012-mi naatsorsuutigineqarluni 1.700.000 kr. Atorneqarnissaat.

Ataatsimiititaliap innersuussutai.

Paaqqinnittarfinni sulisut pikkorissartinneqarnissaannut atatillugu Naalakkersuisut

ataatsimiititaliamit kaammattorneqarput suliamut attuumassuteqartut, tassalu KANUKOKA aamma PIP suleqatigineqarnissaannik. Tamanna aqputigalugu pikkorissartitsinerit imarisaat sapinngisamik amerlanerpaanut siaruartartinneqarnissaat aammalu pissarsissutigineqarnissaat anguneqassamat, tassami taakuummata inatsisissatut siunnersuutip kivinneqarnissaanut suliassanik piviusunngortitsisussat.

Ataatsimiititaliap paasivaa, inatsisissatut siunnersuut kommuninut naammaginantumik atuutilersinneqassappat, annertusisamik nakkutilliineq pisariaqartoq. Ataatsimiititaliap ilisimavaa, "Meeqerivitsialak" suli aallarnisarmat aammalu suli sumiiffinni amerlasuuni atuutilersimanani. Taamaattumik Naalakkersuisut ataatsimiititaliamit kaammattorneqarput, kommuninut attaveqarnerup ingerlanneqartuarnernik eqqumafinneqqullugit, aammalu ajornartorsiutinik nalunaarsueqqullugit kingunerisaanillu kommuninut naammassineqartussanut suliniutinullu amigaataasutut paasineqartunut aaqiinissamat innersuussinissamik.

Inatsisissap atuutinersinneqarneratigut aallaqqaataaniit ataqeqatigiinnermut paaseqatigiinnernullu iluaqutaasussatut ataatsimullu sunniuteqaatinut pitsaasumik kinguneqassasoq ataatsimiititaliamit isumaqarfigineqarpoq

Meeqqanut inuusuttunullu suleriesissap atuutilersinneqarnerani anguniakkanut sapinngisamik pitsaanerpaamik sunniuteqartussatut ataatsimiititaliamit qulaani pineqartoq isigineqarpoq. Ataatsimiititaliaq inatsisissatut siunnersuutip atuutilersinneqarnissaanut qilanaarpoq, naggataatigummi inuusuttut amerlanerpaat ilinniagaqalersinnaaneranut iluaqutaasussaammat.

Ataatsimiititaliap isumaqatigiittup siunnersuut akuerisassanngorlugu inassutigaa.


Taamatut oqaaseqarluni aammalu isumaliutissiissummi allassimasunut paasinnilluni ataatsimiititaliap immikkoortoq aappassaanniigassanngortippaa.




Jørgen-Ole Nyboe Nielsen




Hans Aronsen
Siulittaasoq



Harald Bianco



Ruth Heilmann



Aleqa Hammond